

բանուորին և ազատելու նորս և նորա որդոց կեանքը, այլ հոկտեմբեր ամսին կային նոյն իսկ ռուս բանուորներ, որոնք կազմակերպի և թուրքերի հետ միասին վառեցին Չամբարաքեանդի հայերի տները, օր. Միրզաբեգեանի, Թառայեանի, Արուտչեանի և այլն: Այս այսպէս է, որովհետև պատմական-հասարակական կեանքում աղգութիւնը սուսաւել ղօրեղ ֆակտոր է քան դասակարգային շահերը:

“Որ ունիցի ականջս լսելոյ՝ լուիցէ”:

ԳԱՐ. ԵՆԳԻԲԱՐԵԱՆ

ՆԵՐՔԻՆ ԼՈՒՐԵՐ

Կովկասեան փոխարքայի դիւանատանը կազմուած է մի ժամանակաւոր յանձնաժողով, որ պիտի պատրաստէ Ռուսաստանի բոլոր հայ ուսումնարանների համար կանոնադրութիւն ու ծրարագիր: Փոխարքան առաջարկել է վեհ. Հայրապետին իւր կողմից երկու ներկայացուցիչ նշանակել մասնակցելու այդ յանձնաժողովին: Լսում ենք, որ Վեհափառը մի եպիսկոպոս և երկու աշխարհական է նշանակել՝ միմիայն խորհրդակցական ձայնով:

Վեհ. Հայրապետի կոնդակով ս. Էջմիածնի Հոգևոր ճեմարանի տեսուչ է նշանակուած յայտնի գրագէտ պ. Մինաս Բերբերեանը: Արդեօք պիտի յաջողի նորան վերջին տարուայ քարուքանդ ճեմարանը կարգի դնել և բնական շաւղի մէջ դնել մեր բարձրագոյն վարժարանի յառաջադիմութիւնը: Հաւատում ենք, եթէ միայն... թողին:

Հաագի կոնֆէրէնցիային Վեհ. Հայրապետի կողմից մի եպիսկոպոսից և երկու աշխարհականներից բաղկացած պատգամաւորութիւն է ներկայացել Տաճկահայերի տառապանքները նկարագրելու և դարման հայցելու, բայց կօնֆէրէնցիան չէ ընդունել պատգամաւորութեան խնդիրը:

Բագուի հայոց Կուլտուրական միութիւնը առաջիկայ սեպտեմբերից 42 ծխական դպրոց է բաց անում Ղարաբաղի գիւղերում:

Յայտնի գրագէտ պ. Նիկողայոս Քարամեանցը պատրաստում Հայոց պատմութեան մի ընդարձակ դասագիրք:

Հանգ. Զուբալովի կտակի համաձայն քաղաքային վարչութիւնը Թիֆլիսում յատուկ շինութեան մէջ բաց արեց լսարան ժողովրդի կրթութեան համար, ուր այժմ կարդացւում են դասախօսութիւններ ամէն լեզուով:

ԽՄԲԱԴՐՈՒԹԵԱՆ ԿՈՂՄԻՑ

Մի տարուայ ակամայ ընդմիջումից յետոյ «Լուման» այսօր վերսկսում է իւր հրատարակութիւնը:

Ինչ՞ու համար է «Լուման» վերսկսւում, կը հարցնէ թերեւս պատահական ընթերցողը: Ահա թէ ինչու:

Երբ մի տարի առաջ քաղաքական արհաւիրքների պատճառով սկսեց կաղալ ինչպէս ամբողջ Ռուսիայի, այսպէս նաև հայոց լուրջ մամուլը, մեր թերթը չէր կարող բացառութիւն կազմել, մանաւանդ որ առանց այն էլ արդէն զգալի վնասներ էր կրել մեր խմբագրութիւնը: «Լուման» իւր հրատարակութեան տասնևմէկ տարուայ ընթացքում աւելի քան ութն հազար ռուբլու դէֆիցիտ է ունեցել, որ դամօկեան սուրի նման կախուած է խմբագրութեան վերայ:

Այս հանգամանքները ստիպեցին մեզ ժամանակաւորապէս դադարեցնել թերթը և մենք կարծում էինք, որ այլևս «Լուման» ոչ մի հետաքրքրութիւն չի արթնացնում հայ ընթերցող և բանասէր հասարակութեան մէջ: Բայց մեր ենթադրութիւնը սխալ երևեցաւ.— խմբագրութիւնս վերջին տարուայ ընթացքում առիթ ունեցաւ համոզուել, որ «Լուման» անհրաժեշտ է հայ հասարակութեան. մեզ համոզեցին այն բազմաթիւ գրաւոր և բերանացի դիմումները, որ անում էին խմբագրութեանս օր առաջ վերսկսելու թերթի հրատարակութիւնը, և մենք այսօր վերստին հրապարակ ենք իջնում, յուսալով, որ թերթի համակրողները, ինչպէս և ընթերցող հայ հասարակութիւնը թէ բաժանորդագրութեամբ և թէ այլ միջոցներով օգնութիւն